



MANIFEST ZA DEMOKRATIZACIJU EVROPE

Evropa će biti demokratizovana kada oligarhija bude svrgnuta!

Uz svu njihovu zabrinutost oko inflacije, migracija, populizma, klimatskih promjena, pandemija, sigurnosti i terorizma, samo jedna perspektiva istinski užasava evropske moćnike, a to je: Demokratija! Oni vole da govore u ime demokratije, ali u stvari samo je žele negirati, iscrpiti i suzbiti u praksi. Oni nastoje da preusmjere, izbjegnu, korumpiraju, mistifikuju, uzurpiraju i manipulišu demokratijom kako bi slomili njenu snagu i energiju, stopirajući njene mogućnosti.

Vladavina Evrope od strane ljudi, vlade sačinjene od demosa, je zajednička noćna mora sljedećih subjekata:

- Velikih tehnoloških kompanija, velikih farmakoloških kompanija, onih koje konstantno spašavaju bankari, upravitelja fondova, vlasnika osiguravajućih kuća, bezbjednosno-vojnih-industrijskih kompleksa - ukratko, oživljavanje tapiserije kartela koji preziru većinu i njihovo organizaciono izražavanje
- Njihove armije nametnutih birokrata, 'tehnokrata' i lobista povlače konce vlada generalno, a posebno onih u EU institucijama
- Političkih partija koje pozivaju na liberalizam, demokratiju, slobodu, zaštitu životne sredine, socijalnu pravdu itd., da bi naknadno samo izdali svoje osnovne principe kada dođu do vlasti
- Vlada čije politike socijalizma-za-finansijere i oštih-mjera-štednje-za-sve-ostale podstiču nativistički populizam za koji te iste vlade besprizorno tvrde da mu se suprotstavljaju
- Korporacija koje koriste termine poput "održivi razvoj" i "net zero", a nastavljaju po starom, greenwash-ujući svoj vandalizam ogromnih razmjera
- Medijskih tajkuna koji su normalizovali dezinformacije i instrumentalizovali izazivanje straha



U srcu ponovno oživljenog autoritarizma, i 'liberalnog' i 'populističkog', leži obmana: veoma politički, od vrha ka dolje, netransparentan proces donošenja odluka je predstavljen kao 'apolitični', 'tehnički', 'proceduralni', 'neutralni', i, naravno, 'demokratski'. Njegova stvarna svrha je da spriječi evropske stanovnike da vrše demokratsku kontrolu svojih zajednica, radnih mjesta, životne sredine, novca, tehnologija i uticaja na ostatak svijeta. Surova eksploatacija ljudi, životinja i naše planete postaje prikrivena svrha, jedini motiv, jedini kompas.

Cijena ove obmane nije prost nestanak demokratije, već i permanentni ekonomski ponor, društvena stagnacija, tehnološka unazađenost, ksenofobija i klimatska destrukcija - zastrašujuć, unosno rasprodat poraz evropske civilizacije.

Mora postojati drugi put. I postoji! To je kurs kojem 'službena Evropa' uporno odolijeva svim žilama svog autoritarnog načina razmišljanja: demokratska revolucija!

Naš pokret, DiEM25, osnovan je u Berlinu 9. februara 2016. kako bi pozvao na pravednu revoluciju. Dolazimo iz svih dijelova Evrope, ali i šire. Ujedinjeni smo različitim kulturama, jezicima, naglascima, političko-stranačkim pripadnostima, ideologijama, bojama kože, rodnim identitetima, vjerovanjima, sposobnostima i koncepcijama zdravog društva. Jedna prosta, radikalna ideja koja nas je okupila postala je temelj DiEM25: Evropa će se ili demokratizovati ili raspasti.

Od tada, uspjeh "naših" vladajućih klasa da zaustave demokratizaciju Evrope je potvrdio naše predviđanje: Brexit, novi podijeljenost na istok i zapad koja se pojavila dok se provalija između sjevera i juga produbljuje, nehumano postupanje prema izbjeglicama, napuštanje mladih i starih, patrijarhalno suzbijanje prava žena i LGBTQIA+ zajednice na samoopredijeljenje i slobodu, greenwashing praksi industrije fosilnih goriva - je naslijeđe poraza panevropske demokratije.

Demokratija podrazumijeva 'vladavinu većine', koji su, po pravilu, siromašniji. Suprotnost toga je oligarhija, koja podrazumijeva 'vladavinu nekolicine', koji su, podrazumijeva se, bogatiji. Evropljanima se govori da živimo u demokratijama, za razliku od onih istočno od nas koji su u šakama slovenskih oligarha. Ovo je laž. Vladavina prava je, na sreću, bolje uspostavljena u Evropi. Ali u stvarnosti Evropljani žive u surovim oligarhijama, koje karakterišu povremeni izbori, čiji se rezultati zanemaruju ukoliko idu protiv interesa evropskih oligarha.

U sjenci ove tužne zaostavštine, DiEM25 sada ažurira svoju jednostavnu i radikalnu ideju: da bi demokratizovali Evropu, ljudi moraju svrgnuti njihovu ujedinjenu oligarhiju!

KAKO JE EVROPA POSTALA ZONA BEZ DEMOKRATIJE

Pod vodstvom hegemonije SAD-a, potpomognutim od strane domaćih oligarha, poslijeratna zapadna Evropa se predala kartelu finansijskih institucija i teškoj industriji (koja je kasnije koopitrala vlasnike farmi), čija je inicijalna svrha bila da fiksiraju cijene i redistribuiraju oligopolne profite putem briselske birokratije. Novonastali kartel i njegovi EU administratori, su se plašili demosa i mrzjeli ideju vladavine naroda.

Strpljivo i strateški, proces depolitizacije donošenja odluka je stupio na snagu. Koji je bio rezultat? Sve važne odluke naših parlamenata sa ciljem stvaranja zone bez demokratije unutar EU, bile su upakovane u sveprožimajući pseudotehnokratski fatalizam. Nacionalni političari su nagrađeni obimno za svoje prećutno saučesništvo. Svako ko se protivio ovom procesu, označen je kao “ne-Evropljanin/ka” i tretiran kao prijetnja evropskom jedinstvu!

Stvaranje eura je omogućilo istorijski trenutak: nikad ranije, još od vremena kada je prevagnuo kapitalizam, nijedna oligarhija, nije uspjela, tako odlučno, da liši vlade instrumenata koji bi omogućili redistribuciju prihoda i bogatstava u značajnijoj mjeri. Monetarna unija, od oligarhije za oligarhiju, u kojoj nijedna država ne može da dotakne njihovo akumulirano bogatstvo, jeste oligarhijski san koji je postao java. Strah Margaret Tačer da je euro “federacija koja ulazi na zadnji ulaz” bio je neopravdan. Zašto bi oligarhija ugrozila svoj imunitet od demokratije dozvolivši demokratski izabranu federalnu vladu?

Slom 2008. godine, pokrenuo je slobodan pad bankarskog sistema, za koji oligarhijski euro nije bio dizajniran. Dok su se bankari svijeta ujedinili da natjeraju vlade da ih spašavaju, kontinentalne evropske vlade su bile angažovane da prenesu gubitke banaka na pleća najranjivijih Evropljana: socijalizam za bankare, okrutno siromaštvo za mase. Rezultat? Masovno paljenje prijeđašnjih rascjepa između Sjeverne i Južne Evrope, između evropskog Istoka i Zapada, između Brisela i Londona - i naravno, između bogatih i siromašnih svake zemlje.

Čim je izbila kriza u Evropi, briselski kartel, Evropska Centralna Banka, sve snage Evrope, zajedno sa MMF-om, poslale su armije birokrata da konfiskuju imovinu, penzije i sve što je preostalo od zajedničkih dobara ranjivijih ljudi. Maskirali su masovna spašavanja banaka kao solidarnost prema Grcima, Ircima, Portugalcima, itd., a u stvarnosti je to bila solidarnost sa banksterima - tačnije onim najkorumpiranim i bankrotiranim unutar bankarskog sektora.

Kada su Grci organizovali Grčko proljeće i glasali “Ne” transnacionalnoj oligarhiji, njihova demokratija je ugašena. Od tog trenutka u 2015. godini, zapisano je na zidu: Demokratiji ne može biti dozvoljeno da promijeni ono što oligarhija želi da očuva!



Iz tog razloga, naše oligarhije-bez-granica harmonično sarađuju da okrenu miroljubive ljude jedne naspram drugih: sjevernjake naspram južno-Evropljana, Istočnjake naspram Zapadnjaka, svakoga naspram nacrtanog "drugog". Čak i na ljevici je nastupila ogromna podijeljenost između onih koji žele da se oslobode eura ili Evropske Unije, i onih koji to ne žele. Čuvena zavadi-pa-vladaj strategija je dozvolila eurooligarhima, koji su samu krizu proizveli, priliku da se predstave kao jedini spasioци i ljekovito sredstvo.

Moć oligarha se dalje produbljuje sa razvijanjem korporativnih cloud-zasnovanim, tehnologijama vještačke inteligencije, čija je svrha privatizacija zdravstvenog sistema, edukacije i svih ostalih društvenih institucija; umjesto korišćenja iste tehnologije u službama za društvo. Nikad ne propuštajući da eksploatišu krizu (npr. pandemiju ili rat na periferiji Evrope) naši eurooligarsi nalaze način da masovno pojačaju potrošnju na njihove omiljene mizantropske tehnologije (od nadzora do naoružanja), dok istovremeno nameću okrutne mjere štednje na većinu Evropljana i našu sredinu.

Godinu za godinom, pobjedonosna oligarhija dokazuje da je spremna i voljna da promijeni sve, ako to osigurava da će sve... ostati upravo isto!

ZAŠTO DIEM25?

DiEM25 se pojavio kada je evropsku krizu i recesiju postalo nemoguće izbjeći: bankari su se ujedinjavali na nadnacionalnom nivou kako bi osigurali više pomoći. Politički vladari Evrope su se urotnički saglasili da obezbijede novac za tu pomoć nametanjem univerzalnih panevropskih mjera štednje.

Rasisti, čak i otvoreni fašisti, uzdizali su svoje ružne glave. Da bi ih zaustavili i da bi spriječili sile Evrope da nepovratno podijele i vladaju evropskim narodima, 9. februara 2016. osnovali smo DiEM25 – prvi transnacionalni pokret u evropskoj istoriji. Naša ideja je bila očigledna: finansijeri, birokrate i fanatici udruživali su se izvan nacionalnih granica. Došlo je vrijeme da progresivne snage učine isto.

Naš manifest iz 2016. istakao je radikalni odmak od lijenosti i duboko uvredljivog prikaza sukoba između Njemaca i Grka u Evropi, između 'vrijednih mrava' sjevera i 'lijenih cvrčaka' juga. Umjesto toga, objasnio je da se Evropa razjedinjavala (predviđanje koje je Brexit potvrdio mjesecima kasnije) jer je svemoćni savez oligarhijskih skakavaca (sjevera i juga) svoje gubitke od kockanja stavljao na oslabljena pleća marljivih mrava (sjevera i juga).



Naš manifest iz 2016. pojasnio je da je ksenofobija slika u ogledalu klasnog rata koju je evropska transnacionalna oligarhija pokrenula protiv siromašnih stanovnika svake evropske zemlje. U njemu je objašnjeno kako su ultradesničari i marionete oligarhije dvije strane istog novčića. Otkrilo je da su potrebni jedni drugima, marionete oligarha nametale su štednju koja je dovela do nezadovoljstva koje je hranilo ultradesničare, dok su šanse da ultradesničari osvoje vlast za posljedicu imali da glasači nastave glasati za marionete oligarha.

Naš manifest iz 2016. pružio je temelj za nekoliko ključnih inovacija koje su napravile DiEM25 jedinstvenim pokretom:

Transnacionalizam-na-djelu

Svaka politika, čak i ako je specifična za jednu regiju ili državu, odlučuje se panevropskim glasanjem svih članova, što DiEM25 čini istinski jedinstvenim, transnacionalnim pokretom.

Konstruktivna neposlušnost

Obvezujemo se nepoštovati svaku etički ili politički neprihvatljivu direktivu ili politiku statusa quo; kao što su štednja, ekstrakcija i sagorijevanje fosilnih goriva, ali se takođe obvezujemo na alternativne direktive, politike i prijedloge koji su konstruktivni (tj. racionalni i umjereni) i imaju realan kapacitet, čak i u sadašnjim okvirima, da poboljšaju živote mnogih. npr. DiEM25-ov sveobuhvatni Green New Deal za Evropu, koji je razvijen kao zajednički napor nebrojenih Evropljana iz mnogo različitih zemalja.

Racionalni bijes

Očekujemo li da će eurooligarhija podržati naše konstruktivne prijedloge; npr. DiEM25 Green New Deal za Evropu? Sigurno ne! Pa zašto ih predložiti? Jer je važno pokazati ljudima Evrope, posebno onima koji pate u današnjem režimu, da postoji realna alternativa njihovoj patnji – alternativa na koju njihovi vladari i 'sve po starom' izabrani čelnici zatvaraju oči. Srca i umovi mogih će se, naoružani ovom realnom alternativom, ispuniti racionalnim bijesom koji je preduslov za političku revoluciju; to je ono što treba Evropi.

Transnacionalizam-u-akciji

Reformizam je samo još jedna riječ za mirenje sa trenutnim stanjem ili za kozmetičku, a ne pravu promjenu. Današnja Evropa ne može biti reformisana, može biti transformisana kroz sukobljavanje sa našom oligarhijom, te njenim rušenjem, prije nego izgradimo autentičnu demokratiju.

ZADATAK DiEM25

Mnogi Evropljani odbacuju ideju federacije. Oni se opiru udruživanju suvereniteta. Strahuju da im nije u interesu da dozvole veću 'integraciju'. Sve dok moć ostaje u rukama male transnacionalne oligarhije, u pravu su. Do danas, oni koji su pozivali na „više Evrope“, skoro uvijek su mislili na više centralizovane moći u interesu eurooligarhije.

Zadatak DiEM25 je da ih uvjeri da rješenje nije hermetički zatvoriti naše nacionalne granice – jer to neće spriječiti gubitak njihove preostale moći.

Dužnost DiEM25 je da ih uvjeri da rješenje mora biti rušenje eurooligarhije koja jede njihov suverenitet, autonomiju i slobodu izbora projekata i partnera.

Odgovornost DiEM25 je stvaranje transnacionalnog saveza širom Evrope, i dalje, koji može demokratski srušiti oligarhiju i izgraditi institucije autentične, decentralizovane, participativne demokratije.

VIZIJA DiEM25

Tradicionalne zelene i lijeve stranke ograničavaju se na unapređenje i podešavanje trenutnog sistema. Mnoge, nekad radikalne partije, danas se ponose izbjegavanjem velikih vizija i umjesto toga se koncentrišu na to da se pokažu kao bolji menadžeri postojećeg sistema, čije vlasnike nastoje da pridobiju. DiEM25 ne mari za to.

Da bi demokratizovao Evropu, DiEM25 ima za cilj transformaciju oligarhijskog režima pod kojim ljudi rade. Da bismo ga transformisali, potrebne su nam četiri stvari: razumijevanje kako sadašnji sistem radi, vizija alternativnog ekonomskog sistema kojom ga želimo zamijeniti, nacrt demokratskog upravljanja i plan za nametanje eurooligarhiji naše zamišljene tranzicije u postkapitalističko društvo.

Naš trenutni sistem

Živimo u vremenu tranzicije iz rentijerskog kapitalizma u nešto još gore, u oblik tehnološkog feudalizma: tehnofeudalizam.

Naša ekonomska vizija

Predlažemo potpuno decentralizovan ekonomski sistem zasnovan na nehijerarhijskim kooperativnim preduzećima (zasnovanim na principu jedna osoba-jedna-jedna dionica-jedan glas) koji promoviraju:

(1) smanjenje rasta (degrowth) u sektorima koji štete ljudima, drugim životinjama i životnoj sredini (npr. ograničavanje zagađenja, fabričke poljoprivrede, reklamne industrije, proizvodnje cementa, broj privatnih automobila, industrijsko-vojnog kompleksa).

(2) rast obnovljivih izvora energije, javnog zdravlja, mentalnog zdravlja, socijalnih davanja, neograničenog obrazovanja i kulture.

(3) bezuslovni osnovni dohodak i garancija za posao koji daju demokratizovane centralne banke, u svijetu u kojem se međunarodnom trgovinom i tokovima novca upravlja tako da se ispeglaju neravnoteže (npr. trgovinski deficiti/viškovi) i, u tom procesu, finansiraju stvarna zelena i socijalna javna ulaganja u manje razvijene djelove planete.

Naša politička vizija

Prepoznavamo da su Evropljani odustali od svojih političara - sa potpunim pravom! Kakobismoosnažili građane Evrope, predviđamo nove slojeve dogovorne demokratije (npr. demokratska vijeća za raspravu koja se sastoje od nasumično odabranih stanovnika) između birača i izabranih predstavnika (npr. parlamenta, lokalnih i državnih vlasti). Na panevropskom nivou, DiEM25 je posvećen uspostavljanju niza ustavotvornih građanskih skupština – po principu sličnom demokratskim vijećima za raspravu – koji će iskovati demokratski ustav evropske republike.

Naša digitalna vizija

Predviđamo digitalno zajedničko vlasništvo u kojem građani u potpunosti posjeduju svoje podatke, platforme koje trenutno rade kao digitalni feudi zamišljamo u društvenom vlasništvu, komercijalne usluge koje se kupuju za skromne sume (staćemo na kraj 'besplatnim' uslugama koje nas sada sada pretvaraju u robu velikih tehnoloških kompanija) i Univerzalnu deklaraciju o ljudskim pravima koja zabranjuje sva autonomna oružja bazirana na vještačkoj inteligenciji dok istovremeno štiti dostojanstvo i prava svakog čovjeka.

Naša kulturna vizija

Prepoznavamo da kultura, u svim svojim oblicima izražavanja kroz umjetnost, muziku, misao, i sport, može biti moćan instrument promjene. Kulturu vidimo kao nužno participativno i inkluzivno sredstvo društvene transformacije. meta: Centar za postkapitalističku civilizaciju je međunarodna platforma za umjetnost i kulturu DiEM25, u koordinaciji sa MERA25 i Progresivnom Internacionalom. Kroz umjetnost i istraživanje, rasprave i poeziju, meta nastoji pomoći društvu da raskine sa sumornom sadašnjošću i iznova zamisliti svijet. Sa idejama i misijom DiEM25 u prvom planu, meta se bavi dijagnostikom naše trenutne ere i formuliše viziju postkapitalističke budućnosti kroz medijum umjetnosti, i postaje platforma za nastupe, kampanje, govore i razgovore.

Naš plan za promjenu

DiEM25 se obavezuje na stvaranje širokih saveza sa pokretima koji dijele naše metode konstruktivne neposlušnosti u svrhu stavljanja demosa u centar demokratije svuđe. To ćemo raditi u svakom naselju, radnom mjestu, gradu i regionu. Ali, da bismo promijenili Evropu, moramo promijeniti i vlade koje služe interesima oligarhije. Tamo gdje je to potrebno, DiEM25 će uspostaviti svoju političku partiju (MERA25) da učestvuje na ključnim izborima. U drugim zemljama daćemo doprinos izbornim savezima koji su u skladu sa ovim manifestom. Programski, DiEM25 će se oslanjati na našu agendu srednjoročnih ciljeva (Green New Deal za Evropu) kao i na našu dugoročnu viziju demokratskog, ekološkog, feminističkog, mirnog, neeksploatatorskog sistema koji je oslobođen kapitalističkih šefova, zapovjednički nastrojanih državnih birokrata i suprotstavljen svakoj sklonosti ka kolonizaciji.

NAŠ POZIV

Pozivamo ljude u Evropi i šire da nam se pridruže kako bismo zajedno zaustavili nalet autoritarizma, kako njegove 'liberalne' tako i populističke varijante.

Pozivamo savjesne ljude da prepoznaju da zajedno možemo srušiti "papirnog tigra", odnosno današnju, naizgled, nepobjedivu eurooligarhiju.

Pozivamo ljude koji dijele našu viziju da neumorno rade dok se duboka demokratija ne proširi na korporativni sistem, naš novčani i kreditni sistem, naše lokalne uprave, naše skupštine, naše Vlade i sve naše institucije – sa kulminacijom u transformisanoj Evropskoj Uniji.


Pozivamo javnost da uoči da ono što počinje kao puko protivljenje "socijalizmu za bankare" i "mjerama-štednje-za-ostale", može proizvesti svijet u kojem naša napredna tehnologija funkcioniše tako da nam pomogne u kontroli naših života, da upravlja našim korporacijama po sistemu jedan član-jedna-dionica-jedan-glas, za osnivanje savjeta za dogovorenu demokratiju koja izrađuje zakone koje bi odobraval i naši parlamenti; pa čak i za procjenu društvene i ekološke vrijednosti korporacija i drugih institucija.

Naš poziv obespravljenim i eksploatisanim masama, koje su konstantno zapostavljene je: Ujedinite se da bi djelovali! Nemamo ništa bitno da izgubimo. Ali imamo čitav koninent da dobijemo!

NAŠ ZAVJET

Nadahnuti smo vizijom neeksploatatorske Evrope koja njeguje razum, slobodu, toleranciju i maštu, omogućena istinskom solidarnošću, sveobuhvatnom transparentnošću i autentičnom demokratijom. Težimo sljedećim ciljevima:

1. Demokratska Evropa u kojoj sva politička vlast proizlazi iz suverenog naroda Evrope
2. Postkapitalistička Evropa koja praktikuje demokratiju na radnom mjestu i u svima životnim oblastima, ne samo u izbornoj politici
3. Socijalna Evropa koja njeguje ne samo slobodu od uplitanja, već i univerzalni osnovni dohodak, njegu i dobra koja nas oslobađaju od izrabljivanja
4. Održiva Evropa koja živi shodno mogućnostima planete, umanjujući sopstveni uticaj na okolinu kroz život u harmoniji sa svim živim bićima, očuvanje i obnavljanje biodiverziteta, eliminisanje zagađenja i svih fosilnih goriva
5. Ekološka Evropa koja predvodi zelenu i pravednu tranziciju širom svijeta
6. Internacionalna Evropa koja neevropljane tretira kao ljude koji imaju sami po sebi vrijednost, i koja radi na aktivnoj solidarnosti sa izrabljivanim narodima širom svijeta
7. Ujedinjena Evropa čiji narodi pokazuju isto toliko solidarnosti među nacijama koliko i oni sami među sobom
8. Pluralistička Evropa regija, etniciteta, nacija, jezika, filozofija i kultura u kojima se može biti, u isto vrijeme, Evropljanin i patriota
9. Raznolika Evropa koja slavi razlike i ukida svaku diskriminaciju zasnovanu na društvenoj klasi, obrazovanju, polu, boji kože, starosti, nacionalnoj pripadnosti, filozofiji, vjeri, invaliditetu ili seksualnoj orijentaciji
10. Decentralizovana Evropa koja bi centralnu moć koristila za maksimiziranje demokratije u svim naseljima, gradovima, regijama i državama
11. Transnacionalna Evropa u kojoj političko predstavljanje nadilazi nacionalne granice
12. Transparentna Evropa u kojoj se sve odluke odvijaju pod nadzorom građana i podliježu pomnom ispitivanju
13. Suverena Evropa koja gura svoje domaće tehnologije u službu solidarnosti.
14. Iskrena Evropa koja traži svijetlu budućnost ne skrivajući se od svoje imperijalističke prošlosti



15. **Kulturna Evropa koja koristi i unaprjeđuje bogati kulturni mozaik svojih građana, i to ne samo kao svoju neprocjenjivu kulturnu baštinu nego i djela evropskih disidentskih umjetnika, muzičara, pisaca i pjesnika koji doprinose progresivnoj demokratiji**
16. **Kreativna i tehnološki suverena Evropa koja oslobađa i štiti inovativne potencijale i maštu svojih građana**
17. **Miroljubiva Evropa koja smanjuje napetosti u svojim istočnim, mediteranskim i Egejskim regionima, okončavajući svoje kolonijalne projekte na Bliskom istoku, u Africi i svugdje drugo, uz to dejstvujući kao bedem protiv sirena militarizma i ekspanzionizma širom svijeta**
18. **Otvorena Evropa koja je živa i privlačna za ideje, ljude i inspiraciju iz čitavog svijeta, prepoznajući međe i granice kao znakove slabosti i širenja nesigurnosti u ime sigurnosti**
19. **Evropa dobrodošlice koja to prepoznaje, nakon vjekova tokom kojih su Evropljani kolonizovali ili upravljali politikom ostatka svijeta, sada je potrebno obezbijediti dobrodošlicu migrantima i izbjeglicama**
20. **Oslobođena Evropa u kojoj privilegije, predrasude, uskraćenost i prijetnja nasiljem nestaju, omogućujući ljudima u Evropi i šire, da se ostvaruju u manje stereotipnim društvenim ulogama, da svi uživaju jednake prilike za razvoj svojih potencijala i da mogu slobodno birati sopstvene partnere u svim aspektima života, rada i društva**

Pridruži nam se. Carpe DiEM25!